

Morning Dogri (NSD) National News Bulletin 27-04-2025

- प्रधानमंत्री नरेन्द्र मोदी अज्ज दिनै 11 बजे आकाशवाणी पर अपने मन की बात कार्यक्रम दे राहें देश-विदेश दे लोकें कन्नै बचार सांझे करडन।
- केन्द्री गृह मंत्रालय नै पहलगाम च होए दे आतंकवादी हमले दी जांच दी जिम्मेदारी एनआईए गी सौंपी दिक्ती ऐ।
- लेफ्टिनेंट गवर्नर मनोज सिन्हा होरें पहलगाम आतंकी हमले पर चर्चा लेई कल संगारें 28 अप्रैल गी जम्मू-कश्मीर विधानसभा दा इक बशेश इजलास सददेआ ऐ।
- भारत दे अंतर्देशीय जलमार्ग प्राधिकरण नै माली बरे 2024-25 च 14 करोड़ 55 लख टन कारगो दी रिकार्ड ढुआई दर्ज कीती ऐ।
- इरान दे शाहिद राजा बंदरगाह दे कोल होए दे इक जबरदस्त धमाके च 14 लोक मारे गे न ते 700 शा मते जख्मीं होई गे न।
- टेबल टेनिस च मानुश शाह ते दीया चिताले दी जोड़ी नै डब्ल्यू.टी.टी. कन्टेडर टूर्नामेंट दा मिक्सड डब्लस दा खिताब जित्ती लैता ऐ।

<><><><><><>

PM-MKB

प्रधानमंत्री नरेन्द्र मोदी होर अज्ज बडलै 11 बजे आकाशवाणी उपपर मन की बात कार्यक्रम च अपने बचार सांझा करगन। एह इस मासिक रेडियो कार्यक्रम दी 121मीं किश्त होग। आकाशवाणी ते दूरदर्शन दे समूलचे नेटवर्क, आकाशवाणी समाचार दी वैबसाइट ते न्यूज़ ऑन एआरआर मोबाइल ऐप उपपर कार्यक्रम दा सिद्दा प्रसारण होग। आकाशवाणी समाचार, दूरदर्शन समाचार, प्रधानमंत्री कार्यालय ते सूचना ते प्रसारण मंत्रालय दे यूट्यूब चैनलें उपपर बी एहदा सिद्दा प्रसारण होग। आकाशवाणी जम्मू थमां हिंदी प्रसारण दे तुरत मगरा मन की बात कार्यक्रम दा डोगरी च प्रसारण होग। डोगरी प्रसारण तुस रातीं 8 बजे इक बारी परतियै सुनी कसदे ओ। अज्जै दी मन की बात कार्यक्रम पर इक परिचर्चा रातीं साढ़े 10 बजे साढ़े इस्सै चैनल पर प्रसारत कीती जाग।

<><><><><><>

MEA NIA

गृहमंत्रालय नै पहलगाम आतंकी हमले दी जांच राष्ट्रीय जांच अजेंसी एनआईए गी सौंपी दित्ती ऐ। सूत्रें मूजब हुन अजेंसी आतंकी हमलें दी घटनाउ दी औपचारिक जांच करग। एह्दे शा पैह्ले एनआईए दी टीम नै आतंकी हमले आली थाहर दा दौरा कीता हा। एह् हमला इस महीने दी 22 तरीक गी जम्मू कश्मीर दे पहलगाम दे बैसरन जांगली खेत्तर च होआ हा जेह्दे च 26 लोक मारे गे हे ते केई होर जख्मी होई गे हे।

<><><><><><>

LG-Special Session

उपराज्यपाल मनोज सिन्हा होरें कल 29 अप्रैल गी जम्मू कश्मीर विधानसभा दा इक दिने लेई इक विशेष इजलास सददेआ ऐ जेह्ड़ा पिछले दिने पहलगाम च होए दे आतंकी हमले बारे चर्चा करने लेई ऐ जेह्दे च 25 सैलानी ते इक मकामी बसनीक मारेया गेआ हा, इस विशेष इजलास लेई गुजारश 23 अप्रैल गी मुख्मन्त्री उमर अब्दुल्ला हुंदी अध्यक्षता च लग्गी दी कैबिनेट दी बैठका च कीती गई ही। विधानसभा दी इस विशेष बैठका च आतंकी हमले च मारे गेदें गी श्रद्धांजलि दित्ती जाग, हमले बारे चर्चा कीती जाग ते इस सरबंधी होरने विषे पर बी गल्लबात कीती जाग। एह्दे इलावा इस जालमाना कारवाई दी सख्ती नै निंदेया करदे होई इक प्रस्ताह बी पास कीता जाग। विधानसभा दा एह्दे शा पिछला इजलास “बजट सत्र” हा जेह्ड़ा 9 अप्रैल गी खत्म होआ हा।

<><><><><><>

Cargo IWAI

भारत दे अंतर्देशीय जलमार्ग प्राधिकरण नै माली बरें 2024–25 च 14 करोड़ 55 लक्ख टन कारगो दी रिकार्ड ढुआई दर्ज कीती ऐ। एह्दे च केई प्रमुख चीजें—बस्ते दी माल ढुलाई दा हिस्सा 68 फीसद कोला मता ऐ। प्रधानमंत्री नरेन्द्र मोदी होरें कल रोजगार मेले दे मौके उप्पर नियुक्ति पत्र बंडडदे होई आखेआ जे जहाजरानी, बंदरगाहें ते जलमार्गे सरबंधी मंत्रालय मूजब राष्ट्री जलमार्गे दी गिनतरी 5 थमां बधियै 111 होई गई ऐ, जदके परिचालन दूरी 2 ज्हार 716 किलोमीटर थमां बधियै 4 ज्हार 894 किलोमीटर होई गई ऐ। सरकार दी नमीं जलवाहक योजना एनडब्ल्यू-1, एनडब्ल्यू-2 ते एनडब्ल्यू-16 सने प्रमुख मार्गे पर कार्गो मालके ते अनुसूचित सेवाएं लेई 35 फीसद परिचालन लागत प्रोत्साहन प्रदान करदी ऐ।

भारती अंतर्देशीय जलमार्ग प्राधिकरण दा लक्ष्य अंतर्देशीय जलमार्ग परिवहन दे राहें माल दुलाई दे मॉडल हिस्से गी 2 फीसद थमां बधाइयै 5 फीसद करना ते समुंदरी भारत विजन 2030 दे मूजब यातायात दी मात्रा गी 20 करोड मीट्रिक टन थमां मता करना ते समुंदर अमृत काल विजन 2047 मूजब 2047 तोहड़ी यातायात दी मात्रा गी 50 करोड मीट्रिक टन थमां मता करना ऐ।

<><><><><><>

Centre Advisory

सूचना ते प्रसारण मंत्रालय नै सब्बने मीडिया चैनलें लेई परामर्श जारी कीता ऐ। जेह्दे च उनेंगी राष्ट्रीय सुरक्षा दे हित ते आतंकवाद रोधी अभियानें ते सुरक्षाबलें दी गतिविधियें दी सिद्दी कवरेज थमां दूर रौहने दी सलाह दित्ती गई ऐ। मंत्रालय नै मीडिया गी रक्षा अभियानें या गतिविधियें कन्ने जुड़े दे स्रोत आधारित सूचना पर रिपोर्टिंग करने थमां बी गुरेज करने दी सलाह दित्ती ऐ। मंत्रालय नै आखेआ ऐ जे समें थमां पैहले गै संवेदनशील सूचनाएं दा खुलासा, देश विरोधी तत्वेन लेई मददगार साबित होई सकदा ऐ ते अभियानें दे प्रभाव ते सुरक्षा कर्मियें दी सुरक्षा गी खतरे च पाई सकदी ऐ जे मुंबई आतंकी हमले, कारगिल युद्ध ते कंधार हाईजैक घटनाएं च बिजन रोकटोक मीडिया कवरेज कारण पेदे माड़े असर गी ध्यानै च रखदे होई सब्बने गी जिम्मेदारी आली भूमका नभाने दी सलाह दित्ती जंदी ऐ।

<><><><><><>

Death Toll Iran

ईरान दे दक्खनी क्षेत्रें च स्थित शाहिद राजा बंदरगाह दे कोल होए दे इक भीषण धमाके च मरने आलें दी गिनतरी बधियै 14 होइ गई ऐ। हमले च 750 होर जख्मी होए दे न। ईरान दे राष्ट्रपति मसूद पेजेशिकयान होरें सोशल मीडिया पर इक ब्यान जारी करियै पीड़ितें दे प्रति अपना बसोस प्रकट कीता ते घटना दे कारणें दी जांच दा आदेश दित्ता ऐ। उनें आखेआ जे घटना दी तफसीली जांच करने लेई गृहमंत्री गी उंदे विशेष प्रतिनिधि दे रूपै च खेत्तर च भेजेआ गेआ ऐ।

<><><><><><>

Army Hospital

नमीं दिल्ली च सेना अस्पताल च अक्खिएं सरबंधी विज्ञान आहले विभाग नै ग्लूकोमा दे आपरेशन लेई थ्री-डी माइक्रोस्कोप पेश करियै इक महत्वपूर्ण उपलब्धि हासल करी लैती ऐ। इस थ्री-डी उन्नत तकनीक कन्नै अक्खिएं दे डाक्टर मती सटीकता कन्नै अक्खिएं दे पेचीदा आपरेशन करने च सक्षम हुं'दे न। इस प्रणाली च बशेष थ्री-डी ध्रुवीकरण ऐनक ते 55 इंच दा 4 ज्हार अल्ट्रा-एचडी डिस्प्ले बी शामिल ऐ।

<><><><><><>

RSS Chief

राष्ट्री स्वयं सेवक संघ दे प्रमुख मोहन भागवत होरें आखेआ ऐ जे अहिंसा भारत दा धर्म ऐ ते एह्दे मुल्लें-कदरें दा इक महत्वपूर्ण हिस्सा बी ऐ, पर अत्याचारियें ते उपद्रवियें गी सबक सखाना बी भारत दा धर्म ऐ। नमीं दिल्ली च कल 'द हिंदू मेनिफेस्टो' कताब दा विमोचन करदे होई श्री भागवत होरें आखेआ जे भारत कदें बी दुएं दा नुक्सान ते अनादर नेई करदा, पर जेगर कोई बुराई करने पर तुले दा ऐ तां ओहदा फही कोई इलाज नेई ऐ। उ'नें आखेआ जे गीता अहिंसा सखांदी ऐ, पर अर्जुन नै युद्ध कीता हा कीजे ओहदा सामना ऐसे लोकें कन्नै होआ हा जिं'दा मुकाबला करना जरूरी होई गेदा हा।

<><><><><><>

NTA

राष्ट्रीय परीक्षा एजेंसी-एनटीए नै राष्ट्रीय योग्यता ते दाखल म्तेहान नीट-यूजी 2025 दे बारै च संदिग्ध दावें दिएं रिपोर्टें लेई इक समर्पित प्लेटफॉर्म दी शुरूआत कीती ऐ। एजेंसी नै आवेदन करने आहलं गी गलत कम्म करने ते झूठे दावें दे कन्नै धोखा देने दी कोशिश करने आहले बेईमान लोकें दे बहकावे च नेई औने दी सलाह दित्ती ऐ। एजेंसी नै म्तेहान देने आहले विद्यार्थियें गी इस चाल्ली दी भरम भलेखे आहली जानकारी ते इसी फैलाने आहले लोकें दी रिपोर्ट 4 मई संज्ञां 5 बजे तोहड़ी एजेंसी दी आधिकारिक वेबसाइट पर करने दा बी गुजारिश कीती ऐ।

<><><><><><>

Table Tennis

भारत दे मानुष शाह ते दीया चिताले दी जोड़ी नै ट्यूनीशिया दी राजधानी ट्यूनिश प्रतियोगिता दा मिक्स्ड डबल्स दा खताब जित्ती लैता ऐ। फाइनल च कल मानुष शाह ते दीया चिताले दी जोड़ी नै जापान दे सोरा मटसुशिमा ते मिवा हरिमोती दी दूई वरीयता आली जोड़ी गी 3—2 कन्नै हराइयै खताब जित्तेआ।

<><><><><><>

IPL

कोलकाता च कल रातीं आइपीएल क्रिकेट च कोलकाता नाईट राईडर्स ते पंजाब किंग्स दा मकाबला लगातार बरखा दे कारण रद्द होई गेआ। एह्दे कन्नै दवै टीमें गी 1—1 अंक मिलेआ। 202 रंज दे लक्ष्य दे परते च कोलकाता नाईट राईडर्स नै बरखा करी मैच रोके जाने तगर इक ओवर च बगैर कुसै विकट मोआए दे 7 रंज बनाई लैते हे। अज्ज होने आले दो मैचें च मुंबई च अज्ज दपैहरी साढ़े 3 बजे मुंबई इंडियन्स दा सामना लखनऊ सुपर जायंट्स कन्नै होग ते संजा'लै दिल्ली च दुआ मैच साढ़े 7 बजे दिल्ली कैपिटल्स दा मकाबला रॉयल चैलेंजर्स बैंगलुरु कन्नै होग।

<><><><><><>